

[www.BibleForChildren.org](http://www.BibleForChildren.org)

# Mateo 26



Idi kolang di  
enem ay agew sin  
domatngan di fiesta,  
inmey da Jesus ed  
Betania ay ilin Lazarus ay  
din tinagon Jesus sin  
nateyana. Idi siya di,  
inan Maria di kagodwan  
di litro ay natanig ay nardo  
ay esay kanginaan ay bangbanglo.  
Et insoyat na sin dapan Jesus  
dowanan ponasan sin book na.  
Et napno din beey si banglo na.



Pag emey si Judas Iscariot ay esa sin sinpo ya  
dowa ay pasolot Jesus sin papangolon di papadi  
ta makitolag mo intoy iyat na ay  
mangipolang en Jesus en daida.  
Peteg di ragsak da et inkari  
da ay iyaan das pilak. Pag  
ilogin Judas ay manganap si  
waya na ay manglipot  
en Jesus.




Siya di, tinongpal din papasolot na  
din intogona en daida et en da  
sinagana din kanen da ay para sin  
fiesta. Idi mangmangan da pay  
laeng, nan-as Jesus si tinapay et  
nan-iyaman en Diyos. Asi na pag  
pit-ipit-ingen et idawat na sin  
papasolot na ay nangwani,  
"Alaen yo na ta kanen  
yo, tan si naey  
di awak ko."



Pag man-as tasa ay napay-an si danom di obas et man-iyaman en Diyos. Pag nan idawat en daida ay nangwani, "Alaen yo na ta pantedted-an yo am-in, tan si naey di dadak ay maniglot sin baro ay tolag Diyos. Omayos mo mateyak ta say mapakawan din basbasol di ad-ado ay ipogaw."




Pag kanan Jesus en Pedro, "Simon, dengngem kod nan ibagak. Kindaw Satanas di waya na ay mamadas en dakayo am-in ta say ilaena mo waday maisian en dakayo ay kaman din kaisianan di begas ya teg-ap mo mateg-apan. Ngem inkarkararagak sik-a ay Simon ta say itoltoloy mo ay mamati, et mo mansagong ka kasin en sak-en, masapol ay papigsaem din iib-am."



Asi et kanan Pedro, "Apo, enggay met nakasaganaak ay olay makibalodak ya makikateyak en sik-a."

"Siya say kanam," kanan Jesus, "ngem ibagak en sik-a, mo sin daan pantan-oan di kawwitan si bigat, mamitlo ka ay mangwani en adim am-ammos sak-en."



Somawang pay da Jesus  
ya din papasolot na sin  
lugar ay makwani en  
Getsemani, kanana en  
daida, "Itokdo yos  
na, ta dowanak en  
mankararag ed dagas."  
"Ama, Ama," kanana,  
"kabaelam am-in. Ipalobos  
mo kod ay adiak nam-osen  
din nay omali ay ligat ko.  
Ngem baken koma din laydek  
mo adi din laydem di  
matongpal."





Et isdi di nangipangoana si sinkabeweg ay soldado ya polis di Timplo ay inbaan di papangolon di papadi ya Fafariseo. Nansilasilaw ya nan-armaarmas da. Dowan et kabetbet din esa ay pasolot na sin bag-en di kangatoan ay padi et nalongodan inga na ay makannawan. Ngem kanan et Jesus, "Kosto sa!" Et kinapay na din ingan di bag-en ay sana et nailatonan.



Pag dan depapen si Jesus et in-ey da sin beey di kangatoan ay padi. Mo si Pedro pay et inmon-onod ay namona di betaey da. Ngem idi namongpong da sin gawan di bel-ayan ta man-anido da, en nakianido si Pedro.



Asi et waday bag-en di kangatoan ay padi ay ton-od din lalaki ay nilongodan Pedro di inga na. Kanana, "Ay baken sik-a din inilak ay esa ay gait Jesus sin kad-an di kakakkaiwan?" Ngem kasin insaot Pedro dowan et katan-o din kawwitan. Asi pag komaan et palalo ay man-anog-og.



Pag pomika da am-in ta iey da si Jesus en Gobernador Pilato. Idi sinmawang das di, Pag pooten Pilato en Jesus, "Ay sik-a baw din arin di Judio?" "Mo say kanam et siya," insongbat Jesus. Layden Pilato ay mangibolos en Jesus, isonga nakikali kasin sin kaipoipogaw,


ngem inbogabogaw da en, "Ilansam! Ilansam sin krus!"




Siya et di, inpolang nas Jesus  
en daida ta mailansa sin krus.  
Din sosoldado pay et inpatilid  
dan Jesus din krus na et in-ey  
das sisya sin lugar ay kanan da  
en Kad-an di Tong-an di  
Toktok. Din ngadana sin kalin  
di Judio et Golgota.



Say nangilansaan dan Jesus sin  
krus. Inkrus da abe di dow a ay  
ipogaw, esa sin makannawana,  
esa sin makannigid na.



Pag et nabisngit din kurtinan di Timplo et nandowa. Inpigsan Jesus din kali na ay nangwani, "Ama, italek ko din ab-abiik ko en sik-a." Say kanana di, pag matey.



Idi masmasdem sin agew ay doy ay  
pansaganaan di Judio para sin  
agew ay pan-ibbayan, wadas  
Jose ay taga-Arimatea ay  
nangitoled ay inmey en  
Pilato ay nangdaw  
sin bangkay Jesus.

Si Jose et esa ay  
madayaw ay  
pangolon di Judio  
ay manman-ed sin  
domatngan di  
panturayan Diyos.





Siya di inmey si Jose ay en  
manlakos lopot ay mankilat.  
Pag nan en ibaba din awak  
Jesus sin krus, et  
binotibotana sin lopot  
ay sana, asi na pag  
igto sin liyang ay  
natiktikan ay bato.

Makdeng di,  
pinolag na di  
dakdake ay bato  
ta maenban din  
liyang.



Din agew ay doy ay Biyernes  
et say pansaganaan di  
Judio si para si bigat ay  
agew ay pan-ibbayan da.  
Sin pan-ibbayan ay doy,  
inmey din papangolon  
di papadi ya din  
Fafariseo en  
Pilato et kanan  
da, . . .



... "Apo, ninemnem mi ay sin matmatago pay laeng din doy makaetek ay ipogaw, kanana en matago kasin mo emey di tolo ay agew."




"Isonga pag dan emey sin liyang et minalkaan da din bato ay nain-eb ta say maila mo waday mangolin. Pag dan komaan ay nataynan din sosoldado ay mamanbantay."



Idi nakdeng din agew ay  
pan-ibbayan yan pomatpat-a  
sin Domingo, inmey si  
Maria Magdalena ya din  
kangadngadanana ay si  
Maria ta en da ilaen  
din naiponponan  
Jesus.





Pag et manyegyeg si napigsa, tan  
wada di anghel di Apo ay binmaba  
ay napod langit. Inolina  
din bato ay nain-eb sin  
liyang yan tinokdoana.  
Idi inilan din  
gogowardiya din  
anghel ay sana,

nanpayegpeg das  
palalo ay egyat da  
et natokang da  
ay kaman dan  
natey.



Pag kanan din anghel sin babbabai,  
"Adi kayo emegyat. Ammok ay  
an-anapen yos Jesus ay  
nailansa sin krus. Ngem  
maga isna, tan natago  
kasin ay say inbaga  
na. Omali kayos na  
ta ilaen yo din  
naipayagana."




Isonga pag dan dalasen ay komaan  
sidi ay emeegyat ngem downan da  
aben naragsaragsakan, et  
nanagtag da ay en mangibaga  
sin papasolot na.





Sin nanagtagan da, kawada et si Jesus ay nangabat en daida yan kanana, "Komosta kayo?" Sinmag-en da en sisya, et nandokmog da ya in-gehan dan siki na ay nandayaw en sisya.





Pag manpailas Jesus sin sinpo ya esa ay pasolot na sin pangpanganan da et niyamyamanas daida begew din magay pammati da ya kinakenteg di nemnem da, tan adi da pinati din inpadamag di nangil-ila en sisya sin kasinan natagoan. Idi nakdeng ay nakikalis Jesus en daida, naikayang ed langit et tinmokdo sin makannawan Diyos.



Gapo ta peteg di layad Diyos sin  
ipogaw isnan lobong, inbaa na din  
bogbogtong ay Anak na ta say mo  
sino di mamati en sisya, adi kaisian  
en Diyos ta madosa, mo adi et  
wada en sisya di biyag ay  
iwed patingga  
na.



Roma 3:23

Tan nakabasol tako am-in ya adi tako makad-as sin kinasiged Diyos.

Roma 6:23

Tan din basol et laglagboana di babag-ena ya din ilagbo na et matey ya maisian da en Diyos ay eng-enggana. Ngem si Diyos et sagot di idawdawat na, yan din sagot na et din biyag ay iwed patingga na begew sin nakies-esaan tako en Cristo Jesus ay Apo tako.

Hebreo 9:27

Tan kapilitan ay matey tako am-in ay ipogaw si mamingsan, et pag takon maokom.



## Efeso 2:8,9

Tan din seg-ang Diyos et anggoy di begew ay naisalakan tako babaen sin namatian tako en Cristo. Baken met begew sin inam-amag tako, mo adi et sagot di Diyos. Isonga magay begew si pangit-it-ekan tako sin awak tako, tan din naisalakanan tako et baken manbegew sin siged ay inam-amag tako.

## Roma 10:9,10

Mo ipodno yo sin iib-a yo ay si Jesus din Kangatoan ay Apo ya dadlon naimposoan di pammati yo ay kasin tinagon Diyos sisya, maisalakan kayo. Tan begew sin naimposoan ay pammati tako, ibilang Diyos ay nalinteg tako, ya begew sin pangipodpodnoan tako sin patpatien tako et maisalakan tako.



## Juan 3:16,17

Gapo ta peteg di layad Diyos sin ipogaw isnan lobong, inbaa na din bogbogtong ay Anak na ta say mo sino di mamati en sisya, adi kaisian en Diyos ta madosa, mo adi et wada en sisya di biyag ay iwed patingga na. Tan adi inbaan Diyos din Anak na isnan lobong ta keddengana di kaipoipogaw, mo adi et ta maisalakan da babaen en sisya.

## 1 Juan 5:11-13

Din inbaga na et siya na: indawat na en datako di biyag ay iwed patingga na, yan din poon di biyag ay nay et din Anak na. Isonga din naitatapi sin Anak Diyos et wada en sisya din biyag ay iwed patingga na, ngem din adi pay naitatapi sin Anak na, adi na aben gon-oden din biyag ay nay. Insolat ko dana en dakayo ay mamati sin Anak Diyos ta say ammoan yo ay wada en dakayo di biyag ay iwed patingga na.



Mateo 26-28; Lucas 22-24; Juan 13-21

Storyline by: Edward D. Hughes

Illustrated by: Janie Forest  
and Alastair Paterson

Adapted by: Lyn Doerksen

Kankanaey Bible (kne) © 2000, 2017 Wycliffe Bible  
Translators, Inc. All rights reserved.

<https://www.bible.com/bible/1329/GEN.1.KD>

©2024 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

